



MAJLIS BANDARAYA SEBERANG PERAI

TEKS UCAPAN
YBHG. DATO' AZHAR BIN HAJI ARSHAD
DATUK BANDAR SEBERANG PERAI

SEMPENA
PROGRAM SUNGAI PERAI NATURE WALK

TARIKH / MASA / TEMPAT
13 NOVEMBER 2022 (AHAD)
7.15 PAGI

MEDAN SELERA SRI TAMBANG MEE UDANG
SUNGAI DUA
SEBERANG PERAI UTARA

Yang Dihormati Ahli Majlis-Ahli Majlis

Majlis Bandaraya Seberang Perai

Yang Berusaha Tuan Haji Baderul Amin bin Abdul Hamid

Setiausaha Bandaraya

Majlis Bandaraya Seberang Perai

Yang Berusaha Encik Mohd Nasyarul Bin Ahmad Rizan

Jurutera Daerah

Jabatan Pengairan Dan Saliran Seberang Perai Tengah

Ketua Balai Butterworth & Ketua Balai Bandar Perda

Jabatan Bomba dan Penyelamat Penyelamat

Ketua-Ketua Jabatan dan Pegawai-Pegawai Kanan

Majlis Bandaraya Seberang Perai

Kakitangan-Kakitangan

Majlis Perbandaran Seberang Perai

Tuan-Tuan Dan Puan-Puan Yang Dihormati Sekalian

Assalamualaikum warahmatullahiwabarakatuh,

Selamat pagi dan salam sejahtera,

Alhamdulillah, bersyukur kehadiran Allah S.W.T. kerana dengan izinnya dapat kita bersama pada hari ini dalam Program Sungai Perai *Nature Walk* yang diadakan di Medan Selera Sri Tambang Mee Udang Sungai Dua. Program ini adalah anjuran bersama Majlis Bandaraya Seberang Perai (MBSP) dengan kerjasama Jabatan Pengairan dan Saliran (JPS) di bawah Program Pembangunan Lestari. Program ini adalah berkonsepkan *community empowerment* yang mana kerjasama diwujudkan di antara agensi kerajaan dan agensi swasta dalam penganjuran program.

Saya ingin mengambil kesempatan ini merakamkan setinggi-tinggi tahniah dan syabas kepada kesemua agensi kerajaan dan swasta yang telah bersama-sama MBSP berusaha untuk menjayakan majlis pada pagi ini. Tidak lupa juga kepada semua yang hadir ke majlis pada pagi ini

Tuan-Tuan dan Puan-Puan Yang dihormati sekalian,

Sungai Perai Nature Walk merupakan program yang kali ketiga dilaksanakan bertujuan untuk meningkatkan kesedaran orang ramai tentang peranan sungai dan meraikan sungai-sungai di Seberang Perai, terutamanya Sungai Perai ini. MBSP dalam usaha berterusan melaksanakan pelbagai program dan pembangunan semula Sungai Perai sebagai tarikan kepada penduduk dan pengunjung. Tarikan sedia ada di sepanjang Sungai Perai adalah aktiviti memancing ikan, Restoran Nelayan di kawasan Ujong Batu, Taman Rekreasi Ampang Jajar dan taman-taman rekreasi di kawasan-kawasan perumahan di sepanjang Sungai Perai. Di samping itu, dari segi warisan, Kilang Gula Prai yang merupakan kilang gula terbesar di Malaysia telah dibina di kawasan strategik di kawasan Kuala Sungai Perai.

Selain itu, di Kuala Sungai Perai pula terdapat sistem jambatan alih atau jambatan pusing (*swing bridge*) yang unik dan di antara hasil kejuruteraan terhebat dalam seni pembinaan jambatan. Jambatan pusing yang dibina di atas Sungai Perai ini berupaya untuk membuka atau menutup

lalu bagi kedua-dua pengangkutan air dan keretapi dalam masa yang singkat.

Tuan-Tuan dan Puan-Puan Yang dihormati sekalian,

Sungai Perai atau *Sungai Prai* adalah sungai terpanjang di Pulau Pinang dengan jarak melebihi 20 kilometer dengan kawasan tadahan air terbesar di Pulau Pinang yang meliputi kawasan seluas 505 km². Air sungai ini mengalir ke barat iaitu ke Selat Selatan (*South Channel*) di *Penang Strait* bermula dari Daerah Kulim di Kedah. Ianya merupakan sempadan daerah semulajadi yang memisahkan Seberang Perai Utara dan Seberang Perai Tengah. Kawasan sungai ini adalah kawasan paya gambut yang menyimpan pelbagai khazanah kepelbagaian hidupan flora dan fauna. Terdapat 41 spesis pokok yang dikenali tumbuh di kawasan Sungai Perai. Antaranya pokok bakau minyak, selasih dendi, ketapang, paku rawan, tapak kuda, merbau, butang baju, ambong-ambong dan banyak lagi. Terdapat 37 spesis burung di kawasan Sungai Perai seperti *Japanese sparrowhawk*, *collared kingfisher*, *plaintive cuckoo*, *chestnut headed bee-eater* dan banyak lagi.

Tuan-Tuan dan Puan-Puan Yang dihormati sekalian,

Penganjuran Program Sungai Perai *Nature Walk* adalah untuk mempromosikan gaya hidup sihat dan memberi pendidikan serta kesedaran terhadap masyarakat kepentingan menjaga kebersihan sungai dan

memelihara alam semulajadi. Program ini juga merupakan salah satu *platform* dalam mengetengahkan aktiviti eko-pelancongan di Seberang Perai yang mana Sungai Perai adalah salah satu *landmark* yang amat berpotensi untuk dibangunkan sebagai kawasan pelancongan dan tarikan baru di Seberang Perai.

Sungai Perai *Nature Walk* adalah program berjalan santai sejauh 6.6km menyusuri tebing Sungai Perai sambil menikmati keindahan alam semulajadi. Seramai 500 orang peserta akan dibawa melalui kawasan penternakan lembu, sawah padi dan akan berhenti di Jeti Nelayan Kampung Terus, Penanti, Bukit Mertajam, Seberang Perai Tengah sebelum berpatah balik ke Medan Selera Sri Tambang Mee Udang, Jalan Sungai Dua, Seberang Perai Utara.

Tuan-Tuan dan Puan-Puan Yang dihormati sekalian,

Program Sungai Perai Nature Walk ini diharap dapat mewujudkan kesedaran kepada masyarakat tentang pentingnya memelihara dan memulihara sungai serta flora dan fauna supaya generasi akan datang dapat turut menikmati keindahan alam semulajadi yang ada di Seberang Perai. MBSP mengambil kesempatan ini menyeru warga Seberang Perai supaya memelihara sungai-sungai serta sistem saliran di Seberang Perai dari sebarang bentuk pencerobohan dan pencemaran. Sayangi dan hargailah

sumber air yang kita ada kerana sumber ini merupakan keperluan utama bagi kita meneruskan aktiviti harian kita.

Sebelum saya mengakhiri kata-kata saya, terima kasih saya ucapkan kepada semua yang bertungkus lumus bagi menjayakan program Sungai Perai Nature Walk yang dianjurkan bersama-sama pihak Majlis Bandaraya Seberang Perai dengan kerjasama Jabatan Pengairan dan Saliran dan Jabatan Bomba dan Penyelamat Malaysia disokong oleh Komuniti tempatan.

Sekali lagi saya menyeru para hadirin sekalian untuk mencintai sungai dan terus memberi komitmen terhadap usaha memelihara dan menjaga sungai. Diharapkan dengan program seperti ini dapat merealisasikan *tagline* MBSP iaitu “***Seberang Perai Aspirasi Bandar Masa Hadapan***”.

Sekian, Wabillahi Taufik Wal Hidayah, Wassalamualaikum Warahmatullahi Wabarakatuh.

Sekian, terima kasih.